

TE HEHEURAA API

I neia i te piha neneiraa a Henere, i Roto Miti i Utah, no te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoe.

Nu. 6

Tiunu, 1915

Mat. 9

“Inaha, e fanau mai te hoê tamaiti na oe, e riro oia ei taata parahi noa; na'u hoi e horoa i te hau no'na e ati noa' e i to'na atoa ra mau enemi; e riro hoi oia i te mairihia ia Iseraela i to'na ra anotau. Na'na e faatia mai i te tahi ia Solomona, na'u hoi e horoa mai e te hau e te parahi noa fare no to'u nei i'oa; ei tamaiti oia na'u, ei metua hoi au no'na, e haamau papu hoi au i to'na terono i to'na ra hau i nia ia Iseraela e a muri noa'tu.”

I Paraleipomeno 22: 9, 10.

PARAU FAAITE.

E ta'u mau hoa tai'o vea e, Ia ora na! O vau o to outou hoa faau parau no te Heheuraa Apî. Te faaite atu nei au ia outou i teie nei parau, Ia ore outou ia haere atoa na te 'e'a o “Mana'o ino ma,” o tei parau ra e, “E feia veve te mau orometua Momoni, e e feia taparu moni.” No teie nei mau parau i itoitō ai au, ia noaa to'u ite ia ore tatou ia hape, ia tia'toa ia'u ia papai atu i teie nei mau parau ia outou na.

E homa e, ua parau noa hia teie nei parau e te feia mana'o ino, aore te feia i parau ra i ite maitai i te huru o

teie nei mau taata ta ratou e parau nei, aore hoi ratou i ite papu e, e feia veve mau anei? e aore râ, e feia taparu moni mau anei? Aore hoi ratou i haere i te vahi no reira mai taua mau taata nei, a hi'opoa ai, e ia papu ra, a parau ai. Ua rû noa râ, i te parau faainoraa, ia ore tatou ia au atu i teie nei feia. E tia anei ia tatou taata maohi nei ia parau e, e feia veve ratou, aita paha e tia, no te mea aita tatou i tae i to ratou ra paeau fenua. E tia râ ia ratou ia parau mai ia tatou no te mea, ua tae roa mai ratou i ô tatou nei, e ua hi'opoa, e ua ite i to tatou mau haapaoraa'toa. Ua ite ratou i te mau utuafare te mau mea maitatai e te mea ino, aita râ i parau mai e, e feia veve outou; ua mamu noa râ.

Ua parau atoahia ratou e, e mau orometua "taparu moni." E homa e, eiaha roa ia parau e parau hia aore roa te mau orometua Momoni e taparu i te moni mai te tahi atu mau orometua. E ore e tia i te hoê taata ia faaite mai e, ua taparuhia oia e te Orometua Momoni. Aore hoi ratou i ani haere i te moni i te mau taata, e moni ta ratou na ratou iho. No te aha râ i parauhia'i e, e mau orometua taparu moni? No te mea ua iteahia te tahi mau orometua taparu moni i mua'tu ia ratou, no reira ratou i parau atoa hia'i. I teie nei râ mau anotan aita e nehenehe ia parau, no te mea ua iteahia e, e ere te feie taparu moni; e feia moni râ.

E faaite atu râ vau ia outou, i to'u tere raa'tu i Roto-miti. Na ratou i aufau te moni no to'u parahiraa i Tarafonia, no ratou atoa te moni no te pereoo auahi. No ratou te mau utuafare tau i parahi, na ratou te maa, na ratou i afai ia'u i te mau oire atea. Na ratou i faaite ia'u i te mau vahi tuiroo no Roto-Miti, e ua ite au e, e feia maitatai roa ratou, e mau taata tiaraa teitei, e feia tao'a e e feia moni.

Te faaite atu nei au ia outou mai Tapanu i faaite maira i to'na ho'i raa mai mai Farani mai. Ua tapae ai i Roto-miti, na Iatopo i faarii atu ia'na, i reira to'na iteraa e, ua hape roa to'na faainoraa i teie nei mau taata. O Tavita

Nefa te hoê taata i parauhia e, e orometua veve e te taparu moni. Ua taoto vau i to'na fare hoê pô; hoê ahuru tauatini tara te moni i oti ai to'na fare. E faaapu mamoe ta'na, e iva tausani e pae hanere ta'na mamoe. E i te hebedoma i hoi mai ai au i Tarafonia e hoo oia e toru tauatini ana mamoe, e noaa ia'na e hoê ahuru ma maha tauatini tara i taua hebedoma ra. Ete mau moni i mua'tu, e tia anei ia ia tatou ia ite e e hie te rahi?

No reira o to tatou mau orometua nei, e feia maitatai roa ia. Eaha atu â to ratou maitai? Ua hoo ratou i te hoê fenua i Papeete nei e ua hamani i te fare pure e te fare parahira, e te opua nei â e, e hoo â i te hoê fenua ei faaeearaa no te Ekalesia. E rave rahi atu â te mau mea maitatai ta ratou i opua e vai iho mai no tatou nei.

No reira e te mau hoa no te Heheuraa Apî e, ia ite oe i to tatou mau orometua, e farii maitai mai oe ia ratou. E feia maitatai, e te au maitai roa i te taata. E teie nei te tiaoro atu nei au ia outou. Eiaha roa e haere na te 'e'a o "Mana'o ino ma." O ratou o tei parau e, e feia veve tera, o ratou iho te feia veve. E o te mau orometua o tei parau ra e, e mau orometua taparu moni tera; o ratou iho te mau orometua taparu moni.

—Toae a Maire.


TE MAU HIERO I TAHITO E RA E I TEIE NEI HOI.

(Tuatiraa)

Na te parau i roto i te Vea no Me i faaite mai e, e Hiero e aore râ e vahi mo'a to te Tamarî a Iseraela i to ratou parahiraa i Aiphiti ra noa'tu e mau fatu haamori idolo to ratou ra oia hoi, to Aiphiti. E mea huru papu atoa hoi, ua afai atu ratou i to ratou haereraa i roto i te medebara, te tahi fare, e aore râ, te tahi puhapa mo'a roa.

Na te mau tuatapaparaa parau tahito i faaite mai, e mau hiero to te feia fafau na Iehova i te mau tau atoa.

Te Tiahapa o te Amuiraa ta te tamarii a Iseraela i hamani a puhapa haere ai ratou i te medebara. E mea hamani hia ia mai te au i te hoho'a ta te Atua i faaite. E no te huru o te hamaniraa e mea tia ia afai-atoa-hia taua fare ra i te ratou mau haerea.



E hoho'a tahito roa teie no te Sekene; e ere e hoho'a mau e mea faaaau noa hia râ. E riro râ te reira i te tauturu i to tatou mana'o i te ite i te huru o taua Sekene ra ta Mose ma i hamani.

O taua Tiahapa o te Amuiraa ra e riro paha ia e au i te tahi fare ahu te huru, e mea maitai roa râ, e i to'na hamaniraa ua tuu hia i roto i te ohipa faufaa rahi a taua feia ra. Ua maitai roa te maitai hau e o taua fare ra no te mea e ô te reira i pupuhia i te Atua. Na te Atua iho i faaue ia ratou e hamani i te reira e Na'na i faaite papu i te huru o te hamaniraa, ma te faaite i te hoho'a e te mau mea no te hamaniraa, aita e hoê mea aore i faaitchia.

Ia anihia te mau taata ra e horoa mai te tao'a na taua fare ra ua horoa noa mai e navai roa, "E tao'a rahi hoi tei noaa, e hope roa te mau ohipa atoa i te oti, e e toe â." Exodo 36:7.

No te rahi o te tao'a ra ua porohia te parau eiaha te mau taata e hopoi faahou mai â te tao'a. Na roto i te parau heheu i maitihia'i te mau taata e rave i taua ohipa ra. E ohipa taa ê teie, e ere hoi ia te tahi fare pure noa ta ratou i hamani, e aita hoi te Atua i vaiho noa taua ohipa mo'a ia rave noa hia e te mau taata ra. E tai'o tatou i te tahi tau irava ei hi'oraa na tatou.

"Ua parau atura Mose i te tamarii a Iseraela; Inaha, ua parau a'enei Iehova i te tamaiti a Uri a Hura, no te opu o Iuda, i to'na ra i'oa ia Bezaleela; e ua faai oia ia'na i te varua o e Atua, i te paari, e te aravihi, e te ite, i te mau ohipa atoa ra; ei imi i te ohipa rii nehenehe ra ei rave i te ohipa auro, e te ario, e te veo; e ooti hoi i te ofai ia haamauhia i roto i te vairaa ra, ei ooti raau hoi no te mau ohipa nehenehe atoa ra. E ua faaite oia ia'na ia ite oia i te haapii ia vetahi ê, raua atoa o Aholiaba a Ahisemaka no te opu o Dana ra. O ta'na ia e faai i te paari aau, ei rave i te mau ohipa atoa ra; i ta te ooti ofai ra, e ta te rave ohipa paari ra, e ta te faaunauna ahu ra, i te ahu ereere tapemoana, e te uraura, e te uteute, e te vavai; e ta te raraa ahu ra; e tia hoi ia imi e ia rave i te mau ohipa atoa e rave rahi te huru ra." Exodo 35:30-35.

I roto i te Sekene i vai te hoê vahi parauhia ei aumoa oia hoi te tahi mahora. I roto i taua mahora ra i vai ai te Fata tutia taauahi e te Farii vai veo. Te Sekene mau ra i riro mai te huru e 55 avae te roa e e 10 avae te aano e e 10 avae te teitei, ua vahi hia i na piha e piti, te pae mua o te piha rahi ia e ua parauhia te Vahi mo'a. Te piti o te piha o te Vahi mo'a roa ia. Ia faataahia te mau tahu'a e faatiahia ratou ana'e a tomo i roto i te piha rahi i mua. I te

Vahi mo'a roa i faatiahia te Tahu aRahi ana'e e tomo o roto ra e hoê noa iho taime i te matahiti hoê ra.

Aita e tia ia faaite i te huru o te hamaniraa o te Sekene e te mau mea o roto ra e mea maitai ia tai'o te mau taata ra i te reira parau i roto i te Bibilia. Te mea anae i titauhia i roto i teie parau iti ia ite te mau taata e vahi mo'a to te Tamarii a Iseraela a parahi ai ratou i roto i te medebara. E ua faaue mai Iehova ia hamanihia te reira. E tai'o tatou i te Exodo 40:34-38.

“Tapo'ihia ihora te tiahapa amuiraa e te hoê ata, i a'era te sekene i te hanahana no Iehova ra: aita a'era i tia ia Mose ia haere i roto i te tiahapa amuiraa, no te mea te vai ra te ata i nia iho, e ua i hoi te sekene i te hanahana no Iehova ra.

E ua pee ana'e taua ata i nia i te sekene ra i nia, ua haere te tamarii a Iseraela i to ratou ra mau haerea; ia ore râ ia pee taua ata ra i nia, aore ia ratou i haere, ia tae râ i te mahana i pee faahou ai taua ata ra i haere ai. E tia hoi taua ata no ô ia Iehova ra i te vai noaraa i nia iho i te sekene i te ao, e ua po ana'e, riro atura mai te auahi ra, i mua i te mata o te tamarii atoa a Iseraela, i to ratou mau haerea atoa ra.”

Ia tae atura i te tau, e maha ahuru matahiti i muri iho i to Iseraela faarueraa i Aiphiti, a faatumu-papu hia'i ratou i roto i te fenua i parauhia no ratou. Ei reira ua faatiahia te Tiahapa o te Amuiraa i roto i te oire ra Silo e ua haaputuputu mai te mau taata ra ia ite ratou i te hinaaro o te Atua.

I muri iho ua hopoi hia'tu i Gibeona, e i muri iho i te reira i hopoihia te reira i te oire o Davida oia hoi i Ziona.

Maoro rii a'era e ua fiu roa te Iseraela i te mau fenua e ua hinaaro roa ratou i te tahi arii, e ua roaa hoi ia ratou i te tahi arii. O Davida te piti o to ratou mau arii e ua opua ona e faatia i te tahi fare nehenehe na te Atua. E fare ne-

henehe roa ta'na iho e e fare huru hupehupe to te Atua e ua haama hoi o Davida, tera mai ta'na parau.

“Ua parau atura te arii (o Davida) i te peropheta ra ia Natana, a hi'o na, te parahi nei au i roto i te fare arezi, area te afata o te Atua te parahi nei ia i roto i te paruru.”

Na roto i te vaha a te peropheta Natana i parau mai Iehova ia Davida ma te faaite ia'na e mauruuru ona e farii i te tahi fare nehenehe aita râ ona e mauruuru ia fatia Davida i taua fare ra. Ia au maitai te ô e ia au maitai atoa tei pūpū i te ô e tia'i. E taata maitai Davida i te tahi pae e e taata au maitai i te Atua, ua rave râ ona i te hara e aita i matara te reira. No reira aita ona i au maitai ia pūpū atu i te tahi ô na te Atua.

Na te tahi parau a te arii e haapapu i te reira vahi. Tera mai te parau a te arii: “Ua tia maira te arii ra o Davida i nia, e ua na ô maira, a faaroo mai na, e au mau taeae, e au mau taata e: I opua hoi au e, e faatia i te hoê fare ei faaearaa no te afata faufaa a Iehova, ei taahiraa no to tatou Atua, e ua imi hoi au i te ravea i taua fare ra; ua parau maira te Atua ia'u e, Eiaha oe e faatia i te fare no to'u nei i'oa, no te mea te taata tama'i oe, e ua manii te toto ia oe.” I Paraleipomeno 28:2, 3.

Ua haaputu mai Davida i te ohipa no taua fare ra aita râ ona i faatia i te reira ta'na tamaiti râ o Solomona i faatia.

I muri iho rii i te tau i mono ai Solomona i to'na metua o Davida i te toroa arii, ei reira ua haamata ona i te rave i te ohipa no te heiro apî. E ohipa aia hoi te reira i vai iho hia mai no'na. I roto i te maha o te matahiti o to'na parahiraa i nia i te te rona ua haamauhia te niu o te hiero e i roto i e hitu matahiti ua oti roa taua hiero ra.

—o—

(E tuatihia mai teie parau.)

TE MAU PARAU API.

Tera mai te hoê parau apî maitai roa. Na te hoê totaiete haapae ava i ani i te Peretiteni no Farani o Raymond Poincaire e haapae i te inuraa i te ava e te mau inuraa faa-taero a vai ai te tama'i raa. I to'na pahonora a ua na ô maira oia: E mea ohie roa ia haapao vau i te outou aniraa no te mea aita roa vau i inu noa'tu i taua mau mea ra. E aita vau i inu i te hoê mea e alcool (ava) o roto. I teie nei mau avae na taua totaiete i parauhia i nia i ani atu e rave-rahi te feia toroa rahi Ekalesia i Baretane e haapae i te inuraa ava e ua pahono mai nei ratou eita e nehenehe. Eaha ra to ratou mau mana'o ia tai'o i te parau a te Peresiteni no Farani?

—o—

I roto i te hoê mataenaa rahi i Amarika au titau te hoê pae rahi o te mau taata ia faaorehia te mau fare hooraa ava, eiaha ia hoohia te ava ia taero te mau taata. Na te hoê ture fenua apî i faatia te mau taata e tuu i te parau maite e faa-ite i to ratou hinaaro. Ua rahi roa te taata i hinaaro ia opanihia te hooraa ava e no reira ua opanihia te mau fare hoo ava i roto i taua mataenaa, oia hoi e 80 e te tiahapa fare.

—o—

Na te hoê taata Baretane faatere pahi reva, I faatere i ta'na pahi reva i nia roa e ua tae ona e 20,000 avae i te teitei. No te teitei o to'na haereraa ua moe roa ona i te taata e parahi i raro.

—o—

I te avae Tiurai e reva'tu te tahi tau orometua apî i Tahiti.

Toae a Maere, Faaau Parau,
Rue Dumont d'Urville, Orovini, Papeete, Tahiti.
Frank J. Fullmer, Imprimeur,
2532 Seventh East Street, Salt Lake City, Utah, U. S. A.